

介休縣志目錄

卷一

星野

沿革

疆域

形勝
村堡

城池

關隘

驛站

防汛

兵祥

卷二

山川

水利

橋梁

古蹟

塚墓

卷三

學校

公署

壇廟

卷四

田賦

戶口

倉儲

鹽法

風俗

物產

卷五

職官

封爵

宦蹟

卷六

選舉

薦辟
武進士

舉人

進士

貢生

武舉

卷七

仕籍

卷八

封廕

鄉賓

卷九

人物

卷十

忠節

孝義

文苑

寓賢

術藝 仙釋

卷十一

列女

卷十二

藝文
文

卷十三

藝文
詩

卷十四

雜志

介休縣志卷十二

藝文

邑乘之載藝文也表其地表其人而卽以表其地其人之文顧其文之與地無涉者雖其人負地望概置勿錄焉曰吾志爲邑作也是故志之所不及而文及之文之所不及而詩及之考古徵今地畧備人亦具詳矣又豈獨無愧碑之足表重介休也耶

漢文帝封宋昌詔

方大臣誅諸呂迎朕朕狐疑皆止朕唯中尉宋昌勸朕朕已得保宗廟已尊昌爲衛將軍其封昌爲壯武侯諸

從朕六人官皆至九卿

宋眞宗追封介之推誥

惟神之生嘗以羈勒從晉侯行天下而不言祿晉人思之卒與其母隱死於深山而不顧可謂忠廉自信之士矣則其歿也宜爲明靈血食於其土守臣來告有禱必從庇民之德是不可以無報錫命侯爵神其享之宜特封潔惠侯

仁宗除文彥博判大名府制

朕惟將相之崇資是爲文武之極選隆其名器所以重朝廷列於蕃宣所以屏王室矧乃居留之任必屬老成

之人爰擇剛辰敷告有位具官文彥博器閎而厚識粹而明學得其方通古今而知要才周於物適大小以惟宜自奮發於聲猷早敷揚於中外居則參裨乎國論出則宣暢乎皇威兩踐台司首當柄用賢愚式序舉百職以咸修綱紀甚明贊萬幾而至悉自懇避鈞衡之任出司管鑰之嚴逮此逾時蔚然休問眷言邦哲實簡予衷是用便其擁節之榮委以別京之重勁兵所宿是資總制之權雅俗惟淳兼賴撫綏之政於戲與國同體是爲股肱之良惟民具瞻方隆師尹之望顧我舊德豈煩訓辭往其欽哉祇服休命

賜除宰臣文彥博讓恩命批答

朕躬儉約以先人而生民未足憂勤以勵政而百職多
隳豈布德之不明抑任人之弗至是以齋居正慮先志
後占鑒屢易以爲煩念難知之可慎永惟商周之所記
至以夢卜而求賢孰若用縉紳之公言從中外之人望
卿以舊哲比嘗相予惟宇量能寬以服人惟純誠故久
而益信勲德兼著可以重朝廷忠信不回可以臨大事
夫謀於其始而旣審則果於必用而不疑汝其欽哉朕
命無易所讓宜不允仍斷來章

賜河陽三城節度使同中書門下平章事判河南

府文彥博加恩告勅詔

朕因孟冬之吉辰饗太宮而合食膺受神貺推行慶恩
眷惟同德之臣方處居留之任宜優異數少示眷懷旣
敷告於外庭其往祇予休命

賜河陽三城節度使同中書門下平章事判河南
府文彥博辭加恩不允詔

朕屬者潔齊精誠薦見宗廟蒙神之貺受福孔多推慶
賜以大行均中外而咸及矧我同德乃時舊臣惟體貌
之隆宜加於異數而褒優之意未稱於予衷嘉讓節之
甚勤顧成命之難止所讓宜不允故茲詔示想宜知悉

英宗賜樞密使守司空兼侍中文彥博不允手詔
省所奏伏覲詔書宰臣陳升之位在臣之下者願寢異
恩庶安孤跡事具悉卿翼亮三朝周旋二府國之耆舊
望實素隆升之任用尚新甫登宰席原其雅意必欲推
先是用斟酌禮文裁其宜稱發於朕志奚取常規蓋以
褒異老成豈與例用爲比卿謙恭久著於此何嫌往安
乃居毋逆朕命所乞宜不允

賜樞密使守司空檢校太師兼侍中文彥博乞退
不允手詔

省所再上表乞罷樞府事具悉卿器質方厚謀猷明審

憂公盡忠臨事能斷越自仁祖知卿美材入輔出藩於茲二紀再冠台席一總鴻樞事功蔚然洽於黎庶任重道遠卿實有焉朕負荷前烈夙宵危懼若涉大川必憑舟楫卿當悉心致力以裨不逮而何嫌何疑遽求去位封奏洊至良用撫然撫覽再三殊失所望老成之德重於典刑當體至懷安居厥職所請宜不允

加文彥博食邑實封制

門下雖天子必有尊所以嚴事上之訓惟聖人能饗帝所以昭報本之誠朕祇紹丕基肇稱元祀禮文旣備慶賜誕敷眷惟心膺之臣幹是機衡之任共膺神貺宜處

衆先具官文彥博道茂國華才推人傑體忠厚以居德
壯謀猷而奮庸弼亮三朝周旋二紀再司魁柄仍冠中
書仗鉞臨戎則克渠折首秉鈞調化則黎獻承風內外
洊更望重彌劬矧在纂承之際親聞顧託之言委寄至
隆眷注爲重協贊盛儀之舉克臻熙事之成是用進美
號以褒功取閒田而增邑併伸異數式示優恩於戲慮
危於安所以綏萬國懷遠以義所以靖四夷益懋乃官
用副朕志可

神宗除文彥博樞密使賜功臣制

天極環樞上通帝位之紀神兵會府內嚴師律之謀朕

方垂講丕平進經常武雖天下無事思備禦之不敢忘
蓋王者有征視安危之不敢忽適登髦傑資以輔予具
官文彥博器閎而深材敏以濟早賁賢人之業實膺聖
考之知以忠孝之名形家國之盛節以文武之畧輯將
相之大猷肆纂命於皇圖廼離憂於喪紀迨終哀戚甫
見儀刑屬疆事之方興煩師旄之載舉折衝境外方將
出憺於王靈取畫幄中曷若坐圖於廟勝宜長機廷之
務亶符巖石之瞻於戲過餌比邊未厭貪驕之志再盟
西夏猶苞狂忽之圖終佇奇勲用恢遠馭

除文彥博守司空依前樞密使加食邑實封制

朕若稽先王維御羣品左謀金鉉之老以經治於廟堂
右屬鴻樞之良以定策於帷幄厥有成績可勿褒乎具
官文彥博風力肅明器資恢傑臨至劇有轉圜之易定
大謀如執玉之堅逮事神文之朝已緝熙於鼎路追言
聖考之遇又密勿於機廷肆涼昧之不承會精神於羣
慮雖兵民之異本亦文武之交修未隆贊冊之恩曷懋
圖庸之舉其保宏父允釐華陽顧豈明分之私終繫老
成之助於戲有若闕天尚廸文王之彝罔俾阿衡以專
商家之美往篤爾烈永承於休

除文彥博司徒判河南制

秉國大鈞絕席廟堂之上經時常武運籌樽俎之間維
吾老成多所更踐懇辭幾務往殿近藩敷告於廷進疇
厥位具官文彥博器質宏偉智謀靖深逮事祖宗早登
承弼周旋左右當四海之具瞻密勿樞機實萬邦之爲
憲肆予纘御屬在倚毗深惟注意之勤勉徇均勞之請
眷言耆舊宜所褒崇增秩上公衍封真賦光華故里揭
全晉之旌旄偃息名城壯陪京之屏翰出入中外始終
顯榮於戲進而論道經邦則必告嘉猷於后退而承流
宣化則必下膏澤於民爾惟欽哉尚多受祉

哲宗除文彥博平章軍國重事制

師傳道之教訓先王所以廸厥官老臣重以典刑天下所以資其智廼瞻舊德時謂元勲謀合祖宗之心名載鼎彝之器申攷贊策播告外朝河東節度管內觀察處置等使守太師開府儀同三司太原尹致仕上柱國潞國公文彥博惇大而清明方嚴而信厚出則秉乎旄鉞入則總我鈞衡文武兼備其才夷險能致其力畢公之弼四世三紀於茲傳說之總百官萬邦其乂爵隆無富溢之累名遂有身退之榮神明相其壽康人心想其風采是用還之論道倚以經邦以帝者之師臣謀議廟堂之上以天下之大老制馭夷狄之情庶幾有爲底於極

治陪敦多井申衍真封於戲呂望惟賢起佐文王之治
周公已老留爲孺子之師矧我耆英無愧前哲往宣一
德用格多盤

賜太師平章軍國重事文彥博宰相呂公著自今
後入朝凡有拜禮宜並特與免拜詔

朕聞几杖以優賢著之典禮耄耄無下拜書於春秋魏
太傅鍾繇以足疾乘車就坐自爾三公有疾以爲故事
而唐司徒馬燧亦以老病自力對於延英詔使毋拜今
吾耆老大臣四朝之舊德隆而望重任大而憂深者惟
卿與公著而已方資其耆龜之告豈責以筋力之禮今